

### **Naqqiut**

(Akissuteqaat 11. oktober 2023-meersoq taarserpaa

Allassimaneranik allannguutit naalisannikkut suliarineqarput kiisalu ataatsimiititaliap isumaliuutissiissutaani oqaaseqaatiliornikkut. Allannguutissatut siunnersuutip danskisuuani naqinnerliuineq ilanngullugu iluarsineqarpoq.)

**Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamut piumasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq. Inatsisissamik piareersaasiorluni suliaqarnerup peqatigisaanik, Kalaallit Nunaanni inuiaqatigiinnut akuusitsilersitsinissamik inatsimmik atulersitsinissaq pillugu Naalagaaffeqatigiinni oqartussaasunut Naalakkersuisut saaffiginnissuteqassapput. (Inatsisartunut ilaasorta, Kristian Jeremiassen, Inuit Ataqtigiit)**

### **Akissuteqaat**

(Isumaginninnermut, Ilaqtariinnut, Suliffeqarnermut Nunamullu Namminermut Naalakkersuisoq)

### **Aappassaanneerpera**

Naalakkersuisut sinnerlugit Inuussutissarsiornermut Aatsitassanullu Ataatsimiititaliap sukumiisumik isumaliuutissiissutaanut, Naalakkersuisut suliaminnik nangitsinerannut ilanngunneqarsinnaasumut, qujavunga.

Ataatsimiititaliap isumaliuutissiissummi ataatsimiititaliami amerlanerussuteqartut Naalakkersuisut allannguutissatut siunnersuutaat aappassaanneerneqarnissaanut inassutigaa.

Aappassaanneernissaanut allannguutissatut siunnersuut Naalakkersuisut ataatsimiititaliamut Inatsisartunullu nassiussaa 11. oktober 2023-meersoq ima oqaasertaqarpoq:

**Akuutitsinermut suliassaqarfimmi inatsisitigut killiliussanut tunngatillugu kingusinnerpaamik UPA2025-mi siunnersuummik saqqummiusseqqullugit Naalakkersuisut peqquneqassasut Inatsisartut aalajangiiffigisassaattut siunnersuut. Danskit oqartussaasuunik suleqatigiinneq aallaavigalugu aaqqiissutissaq sorleq malillugu suliap nanginneqarnissaa pillugu Naalakkersuisunit isummerfigineqareerpat siunnersuut saqqummiunneqassaaq. Danskit oqartussaasuinit suleqatigiinneq imaluunniit Folketingimi inatsisiliornerup ingerlanera pissutigalugu Naalakkersuisut kingusinnerpaamik UPA2025-mut siunnersuummik saqqummiussinngippata, Naalakkersuisut Inatsisartuni ataatsimiititaliaq attuumassuteqartoq saqqummiussinissamut amigaataasumut suna pissutaanersoq pillugu ilisimatitsissapput.**

Taamatut naatsumik oqaaseqarlutik Naalakkersuisut immikkoortoq Inatsisartunut suliassanngorlugu tunniuppaat.